

Bouonjour tou'l'monde! Ch'est mé, Peter Germain de Rozé tchi vos pâle acouo une fais.

Jé d'meuthe dans eune maïson tchi fut bâtie par mon arrière-grand-péthe Jean Noë en mille huit chents quarante-deux.

Ch'est eune grande maïson avec quat'chambres, j'tais à penser, quand j'tais mousse et jé d'meuthais ichîn, i' n'y'avait pon eune p'tite maïson par dedans.

J'fus bésouin d' sorti jusqu'au bas du gardîn à la p'tite maïson! Et y'avait deux sièges!! Ieune pouor nous et l'aut' pouor les adultes, un p'tit et un grand creux!!! Ch'tait un mangnifique jour quand j'pouvêmes utiliser lé grand creux!!! Au sé, si y'en avait bésouin, y'avait un bieau pot souos l' liet. Qué l'temps s'change! Dgieu mèrcie!!

Et eune aut' chòse, y'avait sus la mûthâle dé la tchuisînne, un téléphone. Pouor pâler à tchiqu'un, y' avait bésouin dé l' ver un mio au but d'la corde et d'mander à la femme dé l'aut' but lé neunmétho qu'tu voulais. Si man p'tit fréthe 'tait à m'embêter, j'prannais l' téléphone et d'mandais pouor Gourray 24. Ch'tait l'neunmétho d' l'âsile à St Saûveux.

La femme à l'aut' but mé disait: "N'sais pon si bête!" Ch'tait ma couôsinne Connie Le Maistre!! Comme le temps a changi. Achteu tu peux pâler à tchiqu'un l'aut bord du monde avec une petite 'boête' à vot' main, èrgarder des portraits, trouver tan c'mîn, c'mander tchiquechouse pouor arriver siez té, sans aller en ville! Étout j'n'avais pon un bain! I' fallait prendre un bain dans un grand bain en tinne, en d'vant lé graïs au fou dans la tchuîsinne. Et lé lavage 'tait fait dans un 'copper' dans l'âtre dans la p'tite tchuîsinne en driéthe.

Ch'tait tou'l'temps un mêtchi pouor deux. Siez nous, ma méthe et not' femme dé ménage Doris Le Cocq.

Touos l's appartéments avaient un feu en hivé. Jé m'rappelle un feu dans not' chambre, i' faisait froid ch't'année-là! Y'avait une pièche dans la Gâzette la sémaine pâssée, quand tchi qu'i' y'avait pon assez d'femmes dans not municipalité.

Îchîn à St Martin, not Connétabl'ye et Karen Shenton Stone, la fil'ye au bein connu Dick Shenton, étout, j'avons plusieurs femmes dans not Police Honorifique, Conmité des Rats, Inspecteurs des C'mîns. Y'a étout deux femmes tchi prannent lus temps à décorer la pâraisse avec des flieurs: dans les f'nêtres à not salle publique, entouor l'égl'yise et à Gouôrray dans not' fanmeux baté. I' gagnîtent la deuxième plaiche pouor la pâraisse décorée.

La vieilleche c'ménche à prendre eune grand' partie de ma vie! J'ai bésoin dé marchi avec un bâton car ma gambe drouaite né trâvale pon trop bein!

La s'maine pâssée j' fus pouor eune visite à man Docteu au Lido de France. En marchant sus l'tapis jé happis man pid sus le fond l'aithe et mé foutis bas! Tu pâles tch'i' fit ma!!! Chu sé-là j'avais grand ma à m'estonma et jé n'dormis pon.

Le préchain matîn j' fus à l' hôpita pouor vaie tch'est qu'ch'tait! Et bein en tchiant j'rompis ieune dé mes côtes! Dgieu mèrcie les affaires amendent.

Lé jour auprès, j'fus mangi avec des anmîns à Gouôrray. Au c'mechment du r'pas jé m'trouvis malade et quâsiment

j'm'êvanouis! Lé préchain jour j'fus à vaie l'docteu. I' pensit qué ch'tait tchiquechose à faithe avec man tchoeu. Auve chennechîn j'sis oblyigi d'aller vaie un spécialiste, et jé n'pouvais pon conduithe!

Tchille embête! Jé n' pouvais pon sauter dans ma vaituthe et aller éyou qué j'voulais!!! Achteu tout va bein, man tchoeu marche bein et j'peux cachi.

Ch'est râvissant comment qu'les affaires changent quand i' faut d'mander à tout l'monde pouor aller tchique bord.

Chutte s'maine ichîn à St Martîn, ch'tait l'temps pouor faithe lé nièr beurre. Les siens dé not' Chappelle font chennechîn toutes les années pouor gângni des sou. Les pommes sont plîtchies par un tas d'monde à not' salle à la Chapelle, ch'est bouôn d'vaie tout l'monde pâler ensembl'ye! I' c'menchent par mettre lé cidre à bouoilli au manoir des Prés à Grouville. Quand j'tais mousse, ch'tait fait ichîn sus not' fèrme, mais mon n'veu et sa femme, n'veulent pon toute chutte feunmée dans éyou qu'est lus parleux achteu. I' prannent deux's trais jours à tchuithe, à ajouoter les pommes tout l'temps, et r'muer, pour tchi n'happe pon. Quand ch'est prêt, lé bachîn est enl'vé du feu, et l's épices sont ajouôtés. Et tandis qu'ch'est acouo caud, i' l' mettent dans des pots, et vendus.

J'avais oui, qué tchiqu'uns dans L's États avaient dit tch'i' fallait arrêter faithe chennechîn car i' y'a' p'têt' la possibilité que tchiqu'un fusse prîns malade par mangi chu nièr beurre!! Car i'n'avait pon 'té sterilisé!!! Eh bein, en v'là-ti eune bêtise!!!!

Ch'est tout pour aniet!! A la préchainé!!